

## DOMENIE XIV «VIE PAL AN»

### Antifone di jentrade Sal 47,10-11

**O** stin pensant, Diu, al to boncûr  
denti dal to templi.  
Come il to non, ancje la tô laut, Diu,  
e rive sun dute la tiere;  
incolme di justizie e je la tô gjestre.

### Colete

Diu, che inte umiltât di to Fi  
tu âs tornât a tirâ sù il mont ch'al jere colât,  
da ai tiei fedêi une sante contentece  
par ch'a puedin gjoldi pe eternitât  
chei che tu âs sfrancjâts de sclavitût dal pecjât.  
Pal nestri Signôr Gjesù Crist to Fi, ch'al è Diu  
e cun te al víf e al regne dutune cul Spirtu Sant,  
par ducj i secui dai secui.

### PRIME LETURE Za 9,9-10

**Ve che il to re al ven li di te, sclet.**

Dal libri dal profete Zacarie  
Cussi al dís il Signôr: «Gjolt une vore, fie di Sion,  
scriule, fie di Gjerusalem!  
Ve che il to re al ven li di te:  
al è just e vitoriôs,  
al è sclet e al è montât suntun mus,  
sul puieri di une musse.  
Al fasarà sparî i cjars di Efraim  
e i cjavai di Gjerusalem.  
L'arc di vuere al vignarà crevât  
e ur contarà la pâs ai forescj.  
La sô paronance e sarà di un mâr a di chel altri,  
dal Flum fint ai confins de tiere».  
Peraule di Diu.

### SALM RESPONSORIÂL dal Salm 144

**R.** Benedet sêstu tu, Signôr, umil re di glorie.

**O ben:**

**R.** Aleluia, aleluia, aleluia.

O vuei laudâti, gno re e gno Diu,  
o vuei benedî il to non in eterno e par simpri.  
O vuei benedîti une di daûr chê altre  
e laudâ il to non. **R.**

Il Signôr al è pazient e di boncûr,  
pegri tal inrabiâsi e splendit te misericordie.  
Al è bon cun ducj il Signôr,  
il so afiet al rive sun dutis lis sôs voris. **R.**

Che ti laudin, Signôr, dutis lis tôs creaturis,  
che ti benedissin ducj i tiei fedêi.  
La glorie dal to ream ch'a contin,

dal to sflandôr ch'a fevelin. **R.**

Il to ream al è un ream di ducj i secui,  
la tô paronance e dure par dutis lis etis.  
Lui al ten sù chei ch'a clopin,  
al torne a jevâ sù chei ch'a son colâts. **R.**

### **SECONDE LETURE Rm 8,9.11-13**

**Se cul Spirt o copais lis oparis dal cuarp, o vivarês.**

De letare di san Pauli apuestul ai Romans

Fradis, vualtris no sês sot de paronance de cjar ma dal Spirt, dal moment che il Spirt di Diu al è a stâ in vualtris. Se un nol à il Spirt di Crist, nol è dai siei. Ma se Crist al è in vualtris, il cuarp al è muart par colpe dal pecjât, ma il Spirt al è vite par vie de justificazion. Alore se il Spirt di chel che al à resussitât Gjesù dai muarts al è a stâ in vualtris, chel ch'al à resussitât Gjesù Crist de muart ur darà la vite ancje ai vuestris cuarps distinâts a la muart e lu fararà in fuarce dal Spirt ch'al è a stâ in vualtris.

Sicheduncje, fradis, no sin in debit cu la cjar, in mût di vivi seont la cjar. Di fat se o vivarês seont la cjar o murarês. Se invezit cul Spirt o copais lis oparis dal cuarp, o vivarês.

Peraule di Diu.

### **CJANT AL VANZELI cf. Mt 11,25**

**R.** Aleluia, aleluia.

Benedet sêstu tu, Pari, Signôr dal cîl e de tiere,  
parcè che ai piçui tu âs palesât i misteris dal ream dai cîi.

**R.** Aleluia.

### **VANZELI Mt 11,25-30**

**Jo o soi pazient e umil di cûr.**

Dal vanzeli seont Matieu

In chê volte Gjesù al disè: «Ti benedis, Pari, Signôr dal cîl e de tiere, che tu âs tignudis platadis chestis robis ai sapients e ai inteligjents e tu ur es âs palesadis ai sempliçs. Sì, Pari, parcè che cussi ti à plasût a ti. Dut mi è stât dât di gno Pari: nissun nol cognòs il Fi, fûr dal Pari, e nissun nol cognòs il Pari, fûr dal Fi e di chel che il Fi al vûl palesâjal.

Vignît di me, ducj vualtris ch'o sês stracs e masse cjamâts, e jo us fararai polsâ. Cjapait sù il gno jôf e imparait di me, ch'o soi pazient e umil di cûr, e o cjatarês confuart pes vuestris animis. Parcè che il gno jôf al è dolç e la mê cjame lizere».

Peraule dal Signôr.

### **Su lis ufiertis**

Cheste ufierte consacrade al to non  
che nus smondei, Signôr,  
e nus puarti di zornade in zornade  
viers de vite dal cîl.

Par Crist nestri Signôr.

### **Antifone a la comunion Sal 33,9**

Cerçait e o viodarês cetant bon ch'al è il Signôr:  
furtunât l'om che li di lui si pare.

### **O ben: Mt 11,28**

Vignît di me, ducj vualtris ch'o sês stracs e masse cjamâts,  
e jo us fararai polsâ, al dîs il Signôr.

### **Daspò de comunion**

Colmâts di tancj regâi, ti prein, Signôr,  
di cjapâ ancje il regâl de salvece  
e di no cessâ mai inte tô laude.  
Par Crist nestri Signôr.